



Kit ma Opici pa Procekyuta me (ICC) nen kwede



Procekyuta, Luis Moreno-Ocampo ki
Lalub Kor Procekyuta, Fatou Bensouda.

Cal: ICC-CPI/Wim van Cappellen

Opici pa Procekyuta tye dul acel i kin dul angwen pa Kot me Wilobo pi Bal. Latela-ne en aye Procekyuta Madit, Luis Moreno-Ocampo, ma Kacoke pa Lobo ma Lumemba aye oyero dok en tye ki twero ducu me telo ki loyo opici man kacel ki luticce, jami tic ki jami mukene. Procekyuta ocako tic i nino dwe 16 me dwe me abicel mwaka 2003. Giyero Lulub Kor Procekyuta aryo ma gikonyo kore; gin aye Serge Brammertz (Kwedo lok) ki Fatou Bensouda (Kelo adot).

Tic pa opici man aye me gamo ki ngiyo lok ki ngec ma kicwalo wek kinen kace tyen lok madii tye ma weko kiromo kwedo lok, wek gikwed lok i kum nek lumuku, bal i kum dano ki bal i kare me mony; ki wek kikel adot i nyim Kot i kum dano ma bal magi ocung i wii-gi.

Kwedo lok ki kelo adot ma Opici pa Procekyuta timo konyo me cobo gin ma oweko kiketo Kot, ma en aye konyo me giko timo bal labongo nongo pwod pi dano ma gutimo bal maracu maloyo ma kelo lwooro bot dano me wilobo ducu. Man bene konyo me juko kit bal egu-ni.

Malube ki twero-ne, Opici pa Procekyuta tye ki divijon adek:

- **Tic pa Divijon** me Kwedo Lok en aye me kwedo lok (ma calo coko ki ngiyo lanyut, penyo dano ma gitye ka kwedo lok i kum-gi, joo ma gitimo bal i kum-gi ki lucaden). Malube ki man, Cik me Roma mito ni Opici man okwed lok ma cimo bal ki ma pe cimo bal wek kikati ki lok adaa.


- **Divijon me kelo** adot tye ki tic ma omyero otim i kare me kwedo lok, dok bibedo ki tic madit me kelo lok i nyim Jang Kot mapat-pat me Kot.

- **Divijon me Twero pa Kot, Tic kacel ki Winye ngiyo lok ki ngec ma kicwalo**, ki kony pa Divijon me Kwedo Lok; ngiyo lok me yee pido ka dok miyo kony me nongo winye ma mite pi tic ma Opici man timo.

Procekyuta romo cako kwedo lok ka kicwalo lok mo bote ma oaa ki bot Lobo ma Lamemba onyo ki bot Security Council ma nongo tye ka timo tic man me gengo time pa gin mo ma romo kelo peko i kum kuc ki ber bedo me wilobo. Med i kum meno, Procekyuta, malube ki twero-ne, romo cako kwedo lok i ngom onyo i kum anywali me Lobo ma Lamemba, teke Jang Cako Kot pa Kot oyee.

Tye macalo cik pa Opici pa Procekyuta ni kwedo lok omyero okem dano ma bal ocung i wii-gi maloyo pi bal ma otime i lok ma gitye ka kwedo-ne. Acaki me Cik me Roma tito ni Kot obedo yoo me agiki ma giromo tic kwede me kelo ngol matir bot dano ma gitimo bal i kum-gi me nek lumuku, bal i kare me mony ki bal i kum dano. Pi meno, Cik me Roma cimo ni tic pa Kot ki pa Opici pa Procekyuta obedo me medo kor tic pa lobo moni.

Cik me Roma bene cimo ni Opici pa Procekyuta bitiyi ma lone kene. Pi meno, lamemba me Opici pa Procekyuta pe omyero oyeny onyo otii ki oda ma aa ki woko, ma calo ki bot Lobo mo, dul me wilobo, dul ma pe jenge i kum gamente onyo dano mogo.



Luis Moreno-Ocampo, Procekyuta Madit: I nino dwe 21 me dwe me angwen mwaka 2003, Kacoke pa Lobo ma Lumemba oyeru Ladit Moreno-Ocampo me Argentina ma calo Procekyuta Madit mukwongo pa Kot. En tye ki rekod me tic maber mada ma calo Procekyuta, Lakel Adot, lapwony me Univaciti ki ladiro cik i kum lok ma patpat calo ngol matir me wilobo ma kwako bal, cik me twero pa dano, jwiko bwami ki gwoko lupok lok angeya. I mwaka 1984, en otelo kwedo lok i lok ma kikelo i kum lukomanda me mony madongo abungwen, ma i kin-gi obedo lodito lobo macon adek. Joo magi ducu onongo gutiyo i gamente me loc aconya pa lumony ma otelo Argentina i kin mwaka 1976 ki 1980. I pido ma otime, gingolo bal i wii dano abic i kin dano ma gikelo adot i kum-gi. Man obedo lok me acel, inge pido me Nuremberg ma gitimo i kum lodito mony Nazi, ma gikelo i kum dano ma bal ocung i wii-gi pi neko dano mapol. I kare me pido, Ladit Moreno-Ocampo omiyo loke pi adot 700 me 'nek, mako dano ki awun', olwongo lucaden 835 dok okwano documen alip ki alip. Lacen, en okelo adot i kum dano ma bal ocung i wii-gi pi nek mapol i kare me jemo pa lumony i Argentina ma otime i mwaka 1987 ki 1992. Pi mwaka apar iyonge pido me loc aconya pa mony, Ladit Moreno-Ocampo otiyo i lok madongo me ngol matir me wilobo ma kwako bal, ma i kine obedo dwoko cen i Italy ladit mony Nazi macon, Erich Priebke; pido i kum Polici me mung me Chile pi neko General Carlos Prats; ki lok ma gikelo i kum lukomanda me mony ma gidoto-gi pi timo tim maracu i kare me lweny me Malvinas/Falklands. Ladit Moreno-Ocampo obedo lamemba me Dul me *global board of Transparency International* ki porofeca ma woto ka pwony kare ki kare i Univaciti me Stanford ki me Havard.



Fatou Bensouda, Lalub kor Procekyuta (Kelo adot): I nino dwe aboro me dwe me abongwen mwaka 2004, Kacoke pa Lobo ma Lumemba guyero mego Bensouda me Gambia calo Lalub Kor Procekyuta. En loyo Divijon me Kelo Adot i Opici pa Procekyuta. Ma pud pe kiyere, Mego Bensouda otiyo macalo Lamii Tam i lok me Cik ki Lakel Adot i Kot me Wilobo pi Bal ma kiketo pi tutunu pi Rwanda (ICTR) i Arusha, Tanzania kama en onongo iye rwom me bedo Lamii Tam Madit i lok me Cik ki Latela me Unit ma Miyo Tam i lok me Cik. Ma pud peya ocako tic i ICTR, en obedo *General Manager* i beng me cato wil madit i Gambia. I kin mwaka 1987 ki 2000, en obedo *Senior State Counsel, Principal State Counsel*, Lalub Kor Dairekta me *Public Prosecutions, Solicitor General* ki Karan me Cik i Lobo meno, en dong odoko *Attorney General* ki Minister me ngol Matir, kama en otiyo iye calo Lamii Tam Madit i Cik bot Preciden ki *Cabinet* me Republik me Gambia. Mego Bensouda bene obedo tye i laro lok i kum winye me *Economic Community of West African States (ECOWAS)*, Ot Keto Cik me Tung Kupotoceng me Afirika ki Kot me tutunu me ECOWAS. En obedo lacungu pa lobo Gambia i kacoke pa *United Nations* me gengo bal, Kacoke pa luminista me Dul Lobo me Afirika (OAU) i kum twero pa dano, ki i kacoke pa komicon me neno yub pi Kot me Wilobo pi Bal. Mego Bensouda tye ki digiri me *masters* i cik me wilobo ma kwako wot i pii ki cik me nam dok pi meno en aye tye ladiro mukwongo i Gambia i cik me wilobo ma kwako wot i pii.

